

LEGATIO
REGIS PSITTACORVM

TERRA MAGELLANICA
SEV AVSTRALI

pro
SOCIETATE RELIGIONIS

ad
CROMWELLIVM

Angliæ, Scotiæ & Hiberniæ

Protectorem

sub polo septentrionali
σὺν Θεῷ



Imta Copiam Prorhocolli
LONDINENSIS.

ANNO M. D. C. LVIII.

B. 5. 1835. 71. 9 *

12701

C
E
di
fi
ne
va
fu
de
pe
fin
ve
Re
ali
con
con
on
fir
ten
ve
Q
sas
ad

INSTRUCTIO LEGATI.



Os Optatus primus Dei gratia
Rex Psittacorum, Inspectori re-
rum divinarum Desiderio de Oli-
va, fideli nostro, salutem. Inter
graves regni nostri sollicitudines, ea
non est postrema, ut pietas & obse-
quium vera Religionis in ditiones
nobis subiectas introducatur.

Cumque ad nos certa fama pervenerit, esse quoddam
Evangelium, à multis seculis in Asia & Europa pra-
dicatum, cuius gens nostra capax non fuerit; quod po-
stremis his temporibus per viros, extra communem ordi-
nem à Deo vocatos, ad paucula capita redactum; &
 tandem ad vires tenuitatis nostra accommodatum sit;
 futurum speramus, ut Evangelium istud pauperibus
 destinatum, aliquando in paupercula Regione nostra,
 per moderati ingenij Pracones, annuncietur. In eum
 finem convenies Celsissimum virum Oliverium Crom-
 vellium, Anglia, Scotia, & Hibernia, cum potestate
 Regia, Protectorem, Deum terrestrem (cui volupe est,
 alta humiliare, humilia extollere) eundemque post
 consueta Europæis curialia, nostro nomine requires, ut
 convenientes fidei morumque Regulas, genti nostra hanc
 operosas, ad Nos dirigere; Nos etiam populumque no-
 strum, divinâ suâ, quâ pollet eloquentiâ, ad fraternita-
 tem cum reliquis Europa Evangelicis, tanquam uni-
 versorum Protector legitimus, promoveri non gravetur.
 Quia verò tibi perspecta est ingenii nostri mira exigui-
 tas, pluribus capeendis inidonea, nullam fidei morumque
 admittes Regulam, nisi qua deducatur ad Non Ens, sive

traditionem. Cavebis tibi ab agnitione cuiusvis positivivi aut realis; atque inharebis sedulo Negativis & Destructivis: à quâ tractandi ratione invenies Evangelicos non esse alienos. Quapropter ut eò pervenias,
 Vtere permissio, caudaque pilos ut equina
 Paulatim vellas, deme unum, deme etiam unū,
 Dum cadat elusus ratione montis acervi.

Dices: Nos Psittacos esse, & litem non movere, etiamsi asinus canem momorderit, aut quadrupes pauperiem fecisse dicatur; ut qui sciamus litem lite, noxam noxa parturiri. Pergas prosperè, redi feliciter, refer fideliter. Datum in Palatio residentia nostra Kalendis Aprilis. 1656.

Optatus Rex Psittacorum.

Locus † Sigilli.

Credenciales Literæ Legati Regis Psittacorum ad Cromvvelium Protectorem Angliæ &c.

Nos Optatus primus Rex Psittacorum Celsissimo Duci Oliverio Cromvvelio, Regnorum Angliæ, Scotia ac Hibernia, nec nō Evangelicorū omniū per Europam Protectori salutem. Postquā nonnulli ex subditis meis benevolentia Christianorum in Europam abducti sunt, ibique & mores varios, & linguas complures didicerunt; nonnulli ex illis ad Nos, qui in Australi Terra procul ab ista plaga boreali habitamus, redeuntes, magnam attulerunt latitia materiam, referentes imprimis charitatem vestram erga gentem nostram, quæ apud longè, dissitas nationes in pretio

pretiosiss. Illud tamen non postremum, quod de fide vestra Evangelica retulit Desiderius de Oliva, praeses meus ad Vos Legatus, quem si pro stabilienda inter Nos Religionis concordia ut Oratorem nostrum suscipiatis consueta benevolentia, eundemque nostro nomine audiat, & cum felici expeditione ad Nos remittatis, celebrabitur nomen vestrum de polo ad polum. Datum in Xaïpe Psittacorum Arce pacifica. 4. Nonas Aprilis 1656.

Optatus Rex Psittacorum.

Loco † Sigilli.

*Propositio Legati ad Cromuvellium,
Protectorem.*

CElissime Princeps, Regnorum Angliæ, Scotiæ & Hiberniæ, nec non Evangelicorum omnium per Europam Protector, omnem vobis precor prosperitatem huius, & futuræ vitæ, si quæ super sit, felicitatem ab Optato Rege Psittacorum, Domino meo Clementissimq. Postquam sua Maiestas intellexisset ex subditis suis è partibus Europæ redeuntibus, esse Evangelium pauperibus prædicatum, quod novi Evangelii Præcones reddiderint pauperrimum, exultavit ad relationem pauperis ingenii Regio, amplectendamque, capacitati suæ proportionatam Confessionem, decrevit. Atque ideo sua Maiestas me delegavit, ad accipiendas à Maiestate vestra Protectorali, tanquam Evangelicorum Directore & Defensore convenientes Fidei Morumque Regulas, ad offerendas Societatis fraternitatisque Evangelicæ dexterarum, ut

totus orbis intelligat, unam in Meridie & Septentrione teneri confessionem. Quod ut feliciter succedat, placeat Celsitudini suæ aliquem deputare, cum quo tractandi detur facultas.

Actum post Calendas Aprilis, anni 1657.

*Resolutio Protectoris Cromwellii ad
Propositionem Legati.*

Prahabita matura deliberatione super propositione Excellentissimi Domini Desiderii de Oliva, Regis Psittacorum Legati, & expectata motione Spiritus interni, sine qua res arduas aggredi non solemus, uti & præhabito consilio præcipuorum Evangelicorum, sub nostra protectione Deo servientium, quò Evangelium superiore seculo Reformatum, hoc seculo felicissimè restauratum ad Meridionalem orbis plagam facile propagetur, committimus Doctissimo viro Magistro Trefontio, ut tractet cum Excellentissimo Domino Legato de constituendis fidei morumque Regulis genti Psittacorum convenientibus, in finem inchoandæ fraternitatis & concordie Evangelicæ, Nobisque fideliter referat de singulis concordatis, conclusis, stabilitis & confirmatis, ut auctoritate nostra, qua valemus, accedente universa roborentur, & Excellentissimus Legatus cum felici expeditione ad Regem suum dimittatur.

Actum Nonis Iunii 1657.

*Conferentia I. præstat consensum in
Negativis.*

D*esid.* Magnum semper fuit compendium ad felicem maximorum negotiorum expeditionem, si ordo in tractatibus servaretur *Analyticus*; eaque prius removerentur, quæ solidæ concordiæ possunt obstat. Si igitur primum liceat agere de *Articulis*, quos Evangelici dicunt, *Negativos*, magnum optato successui attulerimus momentum.

Tresont. In ijs, quæ rejicimus à fide nostra, sufficit ostendere cum Daillæo nostro (là foy fondee part. 3. chap. 14. §. 10.) ea in S. scripturis non repeteri. Quamvis enim initio dixerimus, Pontificios, aliosque errantes, in multis Verbo Dei contravenire: hoc tamen, quia altioris est indaginis, non est necesse, ut defendamus, maximè quod subtiliores probationes populus non capiat. Quapropter iam, via diversa ab erroribus, recedimus, quia

Visum est tandem, iuxta vulgi sermonem

Potius recurrere, quàm perperam currere.

Nam ut dixi, sufficit nobis, sola negatione instructos, quoslibet errores à fide nostra rejicere.

Desid. Movet me etiam illud Daillæi (part. 1. chap. 3.) quod dicat, in Confessionibus Reformatorum plurimos rejici errores, quorum formalis reiectio partem non faciat fidei Reformatæ. Atque hinc spem concipio, futuræ in hac parte concordiæ; cum in Regione nostra nihil positivè credatur, quod ceu errorem à fide sua rejiciant Evangelici.

Tresont. Hac fide negativa instructi, universos errores mira facilitate rejicimus; neque tenemur ad ullam rationem proferendam: quia non entium nullæ sunt qualitates.

Desid. Itaque de negativis iungamus dexterar:

Nulla enim est difficultas. Possunt Psittaci non credere. Trefont. Bene.

Conferentia II. determinat aliquot articulos negativos.

D*esid.* Diem hesternum albo calculo in suis fastis signabunt Psittaci, quo inventa est cum Evangelicis concordia in admittendis articulis negativis.

Trefont. Sed opus est, ut determinemus nonnullos articulos negativos, tum ut Celsissimo Protecto-ri fiat satis, tum ne ad Regem tuum vacuus redeas.

Desid. Placet.

Trefont. Benè dixit Calixtus noster (*Desid.* concord. n. 6.) observandum: non esse viri boni, nedum Christiani, aliud sentire, aliud refragante conscientia profiteri. Quia verò multa Pontificiorum non possemus profiteri, nisi contradicente conscientia; ideo tanquam viri boni & veri Christiani sequentes articulos negativos à fide nostra rejicimus.

1. Aliquos libros, quos dicunt Pontificii Canonicos, non credimus esse verbum Dei.
2. Nullas credimus Traditiones, tanquam necessarias ad salutem.
3. Non credimus Ecclesiam Christi semper esse visibilem in terris.
4. Non credimus Pontificem Romanum esse Christi Vicarium.
5. Non credimus Concilia generalia esse infallibilia.
6. Non credimus Episcopum de iure divino esse maiorem Presbytero.
7. Non credimus purgatorium.
8. Non credimus, orandum esse pro defunctis.

9. Non

9. Nō credimus venerandos esse Sanctos demortuos.
10. Non credimus, Sanctos pro nobis intercedere in particulari.
11. Non credimus invocandos esse Sanctos.
12. Non credimus, Sanctos intelligere nostras preces.
13. Non credimus venerandas esse sanctorum reliquias.
14. Non credimus venerandas esse Sanctorum imagines.
15. Non credimus , Baptismum collatum à Laico esse validum.
16. Non credimus confirmationem esse Sacramentum.
17. Non credimus, pænitentiam esse Sacramentum.
18. Non credimus, ullam vim esse Indulgentiarum.
19. Non credimus , Christum in Eucharistia esse præsentem sub speciebus panis & vini.
20. Non credimus Transubstantiationem.
21. Non credimus Sacrificium Missæ.
22. Non credimus licitam Communionem sub una specie.
23. Non credimus extremam unctionem esse Sacramentum.
24. Non credimus Sacramentum Ordinis.
25. Non credimus Sacramentum Matrimonii.
26. Non credimus vota Monachorum esse licita.
27. Non credimus esse peccatum veniale ex natura sua.
28. Non credimus peccatum Originale in baptismo auferri.
29. Credimus , nulla esse hominis iustificatione merita.
30. Credimus Iustos non posse observare Legem Dei.

Hæc, & alia multa, quæ in nostris libris & Confessionibus occurrent, rejicimus à fide nostra per simplicem negationem.

Desid. Sed ubi tu dicis, non credimus invocandos esse Sanctos, nunquid liceret dicere, credimus non esse invocandos Sanctos: & sic de reliquis?

Tresont. Planè licet, & colloquendi modo ipsæ Confessiones nostræ utuntur: Abstinemus tamen hoc tempore propter iniquas vexationes Pontificiorum.

Desid. In gente nostra nihil veremur de Pontificiis, utile autem nobis fuerit articulos negativos positivè exprimere, ut fidem nostram negativam solidius profiteamur, & ut præfati articuli ad modum Litaniarum decantentur in nostris Basilicis.

Conferentia III. continet consensum in Articulis non necessariis.

T*Resont.* Sed mi, future frater, Desideri, ut nostra solidè statuatur concordia, non sunt de facie hauriendæ controversiæ; verum sedulò distinguendum inter Articulos necessarios, & non necessarios, quos alii vocant fundamentales & non fundamentales, essentielles & non essentielles. Hæc enim nostra distinctione hostium quorumcunque; maximè Pontificiorum, artes eludimus & elidimus omnes. Huius oportet præsentem semper conservare memoriam, qua, velut clava Herculis, opinionum perniciofa monstra edomantur.

Desid. Videndum erit, ne Hydram secemus, & ne uno sublato ipso commodo plura enascantur.

Tresont. Nec sacramentum quidem, ut dicunt, vel festuca difficultatis supererit, si Calvini, aliorumque nostrorum sententias inspexeris. Afferunt enim
uno

quo ore, nullum esse præiudicium unitatis, etiam si Ecclesiæ dissentiant in articulis non necessariis. Calvinus instit. lib. 4. c. 1. §. 12. 14. 17. & cap. 2. §. 1. Buchananus Lec. 41. de Eccl. §. 21. Marloratus in 1 Cor. 3. 12. & 15, Crocius. Anti-Becan. contr. 3. sect. 11. §. 3. BADECL. in Resp. ad artic. Burdeg. art. 61. Hoffmann Loc. 29. Thess. 7.

Desid. Id maximè conveniet pauperculæ regioni nostræ, ubi moris (quemadmodum apud Evangelicos) sacrum sine fumo facere, & Deo quàm parissimè reddere oblationes.

Tresont. Sufficit in necessariis articulis statui concordiam, reliquis omnibus posthabitis. Non necessarios nihil moramur pro adipiscenda salute: & si quis eos non assequatur, non capiat, non penetret, siue etiam male informatus ex professo neget, non propterea arceretur ex nostra communione, & genuina fraternitate. Nam sicut Agnus Paschalis comedebatur, reliquis igni traditis: ita tenemus necessaria; at non necessaria reservamus igni charitatis Evangelicæ, quo pacificè consumantur.

Desid. Benè dixisti: habebis Pistracos faventes. Illi enim, cum de articulis non necessariis, non fundamentalibus, non essentialibus per essentiam nihil credant in alterutram partem, neque in illis errabunt, multò minus erunt ex eo capite à fraternitate Evangelicorum arcendi.

Tresont. Dicant Pontificii, quod voluerint. Culicem haud curat Elephantus Indicus. Verus Christianismus non tollitur, etsi quis erret in articulis non necessariis.

Desid. Da dexteram frater; quia hucusque feliciter succedit tractatio. Vestra nihil interest, quacunque ratione credantur articuli non necessarii: nostri autem nihil interest, etiam si non credantur.

Tresont.

Tresont. Sancta fraternitas & inviolabilis, Pstaco - Evangelica.

Conferentia IV. designat aliquot articulos non necessarios.

D*esid.* Convenimus iam de Articulis non necessariis quidem; sed oportet nostræ genti etiam aliquot non necessarios Articulos designari, quos Doctores vestri Orthodoxi tenuerunt pro non necessariis, ut nemo de facili ad condemnationē alterius, siue credentis siue non credētis prorumpat. Sed se constanter teneat in negativo: **NON DAMNO.**

Tresont. Pium omnino desiderium, dum enim aliqui minus moderati in condemnandis aliis sunt promptiores, audias frequenter portenta non differentium Theologorum, sed hominum somniantium. Sed hoc non est mirum, quod Polares ad Boream populi acri passione frigoris subinde perstricti agant contra calorē caritatis. Sed, en, Accipe Doctorū nostrorum censurā de multis non necessariis Articulis.

1. Error, est in re nō necessaria, si quis credat Pontificem Romanum esse Successorem Petri, & Vicarium Christi. Hoc tenuit Hus. de Eccl. c. 9. & 13.
2. Similis error est, si quis credat purgatorium. Hoc agnovit VViclefus. lib. 4. Dialog. c. 22. Hus. in serm. de exequiis.
3. Similis error est, si quis credat, preces pro defunctis esse licitas. Has docuit Hus in *Electid.* suæ fidei.
4. Similis error est, si quis credat licitē invocari sanctos demortuos. Hoc tenuit Hus. Epist. 22. VViclef. lib. 3. Dialog. cap. 30. Calixtus.
5. Similis error est, si quis teneat licitam esse venerationem imaginū. Hoc admisit Hus. de Adorac.
6. Similis error est, si quis teneat, baptismum à Laico administratum esse validum. Hoc docuit

VViclef.

VViclef. lib. 4. Dialog. c. 11.

7. Similis error est, si quis credat, Christum esse realiter præsentem in Eucharistia sub speciebus panis & vini. Hoc docuit Hus. Tract. de corp. Christi & docent Lutherani.
8. Similis error est, si quis credat Transsubstantiationem. Hanc tenuit Hieremias Patriarch. in Censur. Orient.
9. Similis error est, si quis credat Limbum Patrum teste Ioanne Crocio. de unit. Eccl. c. 7.
10. Similis error est, si quis credat descensum realem Christi ad inferos. Teste Crocio. loc. cit.
11. Similis error est, si quis credat speculum Trinitatis. Teste Crocio loc. cit.
12. Similis error est, si quis teneat doctrinam Pontificiam de abstinencia à carnibus. loc. cit. testante Crocio.
13. Similis error est, si quis teneat doctrinam Pontificiam de cælibatu, Teste Crocio. loc. cit.
14. Similis error est, si quis credat omne iuramentum esse peccatum mortale. Hoc VValdenses tenuerunt, teste Reinerio cap. 5. Petro de Pilichdorf cap. 36. Ebrado. cap. 14. Concil. Terracon. Tom. conc. 3. p. 714.
15. Similis error est, si quis doceat, Deum necessitare creaturas ad quemlibet suum actum. Hoc tenuit VViclef. Dialog. lib. 2. cap. 3.
16. Similis error est, si quis doceat, omnia evenire ex necessitate absoluta. Hoc tenuit VViclef. lib. 3. cap. 8.
17. Similis error est, si quis credat, prædestinatos non habere certitudinẽ de sua salute, nisi probabilẽ Hoc tenuit VViclef. lib. 4. cap. 10. Hus de Eccl. c. 5.
18. Similis error est, si quis credat, baptismum delere quodcunq; peccatum. Hoc credidit VViclef. 4. cap. 11.
19. Simi-

- 19 Similis error est, si quis credat matrimonium esse Sacramentum. Hoc tenuit VViclef. lib. 4. cap. 20.
20. Similis error est, si quis credat, per adulterium unius partis non dissolvi vinculum matrimonii. Hoc docuit VViclef. lib. 4. cap. 21. Hus de Matrim. cap. 1.
- 21 Similis error est, si quis doceat, tres esse partes pœnitentiæ, contritionem, confessionem, & satisfactionem. Hoc docuit Hus. de pœnit.
22. Similis error est, si quis credat, omnia peccata integrè confitenda esse Sacerdoti. Hoc tradidit Hus. ibid.
23. Similis error est, si quis credat in Missa offerri sacrificium propitiatorium. Hoc credidit Hus. de Sacram. cap. 1.
24. Similis error est, si quis credat, malos in Sacramento accipere corpus & sanguinem Domini. Hoc credidit Hus. ibid.
25. Similis error est, si quis credat in Sacramento tamdiu esse corpus & sanguinem Domini, quamdiu manet species panis & vini. Hoc credidit Hus. ibid.
26. Similis error est, si quis credat Leges Ecclesiæ obligare conscientiam. Hoc credidit Hus. de corp. Christ.
27. Similis error est, si quis credat, non prædestinatos ad vitam æternam quandoque iustificari, & accipere remissionem peccatorum. Hoc credidit Hus. de Eccl. cap. 3.
28. Similis error est, si quis credat prædestinatos ad vitam æternam posse in hac vita excidere ex gratia. Hoc credidit Hus. ibid. cap. 5.
29. Similis error est, si quis neget, perpetuam virginitatem B. Mariæ. Teste Crocio. de univ. Eccl. cap. 17.

30. Similis error est, si quis asserat, Spiritum S. à Patre per filium procedere. Croc. loc. cit. Vides in præfatis exemplis mansuetudinem veri Christianismi, quæ multa suffert, multa tolerat pro universorum tranquillitate & pace, sine qua nemo ad beatam perveniet æternitatem.

Desid. Placet mihi illa tua clementia contra nefandi schismatis duos ac diros Patronos.

Tresont. Hoc igitur sit fixum ac firmum, malè agere eos; qui ex nostris damnant tam credentes, quàm non credentes Articulos illos; qui non sunt necessarii; quoniam in his licet errare salva caritate Plutaco - Evangelicâ.

Conferentia V. præstat consensum, ut nemo, condemnatur etiam propter everisionem fundamenti per solam consequentiam.

T*resont.* Postquam nonnulla removimus, quæ videbantur obstare posse incundæ inter nos fraternitati, necesse est explicare reconditum Theologiæ nostræ mysterium, quomodo nullus condemnandus sit etiam propter everisionem fundamenti, quæ tantum declarari potest per consequentiam ex scripturis deductam.

Desid. Magnum Regi meo præstiteris beneficiû. Quò enim plura ab obiecto fidei necessario remonentur; eò minor erit in reliquis difficultas.

Tresont. Agnosco; multa ex scripturis per firmâ consequentiam posse deduci, quæ sunt cognitu perquam utilia: sed sub amittendæ salutis periculo sum demum tenenda sunt, cum in scripturis contineri, vel ex scripturis necessario consequi manifestè declarentur & intelligantur, uti præclare tradit nobis Davenantius. Epist. ad Duræum.

Desid.

Desid. Apprimè placet ea propositio: quantum enim capio, nemo ex tali errore damnabitur, nisi intelligat se errare. Psittaci igitur, qui non intelligent se errare, versabuntur extra periculum amittendæ salutis, etiam si eiusmodi errorem tuerentur.

Tresont. Qui aliquid falsi admisit animo, non ideo & cætera omnia, quæ ex eo eveniunt, absurda agnoscere cum, & tueri concludendum est. Sic olim Tertullianus & è vestustissimis Patribus non pauci animam humanam ex traduce propagari docuerunt: at mortalem esse (quod ex illo consequitur) non modo non concesserunt, sed constantissimè clarissimeque negarunt. Sane neque Tertulliano, & paria cum ipso de animæ humanæ origine sentientibus, affingendam existimamus eiusdem mortalitatem, quod hic error ex illo colligi posse videatur. Ita Minist. Eccl. Gall. ad Duræum. vide Daillæi Apologiam. cap. 9.

Desid. Maneat igitur inter nos conventum generaliter: quod, quicumque tener, & profert aliquid, ex quo, necessaria aliqua deductione, & sequela, hæresis videatur posse colligi, si ille hæresim illam expressè dereftatur, & paratus est suum dictum abiurare, si viderit sequi ex eo hæresim, pro hæretico neque habendus est, neque ut hæreticus vitandus, Vide Marc. Anton. de Domnis. lib. 7. cap. 12. n. 8.

Conferentia VI. Declaratur exemplo quorundam Doctorum Protestantium, quid & quantum possit fieri contra conventa in præcedenti conferentia, salva caritate Psittaco-Evangelica.

T*Resont.* Sed oportet etiam contrariam sententiam nostrorum Doctorum manifestare, ne quid videar dissimulasse. Secundum Petrum Martyrem igitur Epist. 42, Non vere dicitur, ut qui negat

con-

consequens, minimè inficiuntur antecedens: id enim res ipsa negant, tametsi verbis dare videantur; everfio quippe consequentis adeo pugnat cum antecedenti, ut simul nequeât consistere. Aliter tamen sensit idē Martyr, quando dixit: quæstionem de Eucharistia cum Lutheranis controversam, ~~non~~ esse non debere, ut inter fideles communionem & charitatem dissolvat. Possem plures ex nostris adducere, idē cū Martyre sentientes, sed nihil opus est in re aperta.

Desid. Quamvis ad Psittacos nihil pertineat, sive priorem sententiam, quæ negativa est, sive simul posteriorem, quæ ei contradictoria est, Protestantes tueantur: gratum tamen erit nosse, quæ inde ad vos redeat utilitas.

Tresont. Magna omnino & incomparabilis. Si enim Unionem tractamus, cum aliis Ecclesiis Christianis, priorem sententiam amplectimur: sin autem adversus Pontificios aliosve refractarios bello decertamus offensivo, posteriorem sententiam, velut gladium utraque parte acutum, fortiter protendimus.

Desid. Laudo ingenium. Sed placetne id ipsum uno alterove demonstrare exemplo?

Tresont. Imo. quod igitur spectat ad illas controversias de omnipræsencia corporis Christi, de idiomatum communicatione, quisquis cum iudicio perpendit, quid utrinque concedatur, quid negetur, perspiciet illico nullum fundamentalem articulum, sive ab his, sive ab illis in dubium vocari, nedum oppugnati aut everti. Quidquid enim ab Ecclesia Catholica in symbolis conciliisq; universalibus hisce de rebus definitum est, id utrique pariter rejiciunt & abominantur. Quod autem per consequentiarum funiculos, alii alios aliquando pertrahere conantur in lutum sordidorum hæreticorum, id nō tam mirandum quàm dolendum est. Davenant. ad Duræum Epist.

Desid. Mitis est illa de Lutheranis sententia.

Tresont. Audi nunc etiam contrariā. Iuxta nostros Lutherani in hac parte superant absurditate Eutychen & Svenckfeldium: superant Marcionis figmentum: partim ipsis dogmatibus partim ex his consequentibus absurdis multipliciter doctrinam Ecclesiæ depravant, articulos fidei evertunt, in spectra & allegorias transmutant, & in sensus alienos detorquent, hæresium & idolorum fundamenta ponunt, & radices plantant. Vide Admon. de lib. Concord. cap. 9. &c.

Desid. Opportuna nobis erit illa sententiarum contrarietas: dum enim neutra à vestris tenetur, tanquam necessariò amplectanda, licebit Pistracis vel solam negativam, vel utramque oppositam invicem destruentem, adeoque in nihilum recidentem, pace vestrâ rueri.

Tresont. Nimum crassè hoc exprimis: non est mos ille apud nos ita crassè loquendi; sed cum discretione, & observata temporum & locorum ratione, ut dictū fuit, quando contra alios & alios pugnamus.

Desid. Hoc probè capio. ego planè & quod res est dixi. pergamus nos in caritate nostra.

Tresont. Dabo aliud exemplum. Dissidium nos inter & fratres nostros, quos Lutheranos nuncupant, enatum de cœna pietati præjudicium nequaquam facit. Agnosco non magis posse nos credere, quam concipere, quod ponunt, corpus Domini esse præsens realiter intra panem Eucharistiæ. Nihilominus hæc, quam tuentur opinio, hos intra manens terminos, nullum habet venenum. Non tollit Christo formaliter, directè, & immediatè nec substantiam suam nec proprietates suas. Hypothesis hæc nulli nos involvit, quod sit oppositum seu pietati, seu charitati, seu honori Dei aut bono hominum. Ea propo-

Ver Regni hujus Ecclesiæ, conformiter haud pridem in ultimæ earum Synodo Nationali, Carentonij anno. 1631. decreto expressè sancito, Lutheranos, quos vocant, communioni & mensæ admittunt propriæ hac non obstante opinione, & paucis alijs minoris adhuc momenti, particularibus, quæ communiter populus non tenent. Inquit Daillé Apol. cap. 7. Alii etiam ex nostris similia nec semel, nec privatim tantum declararunt.

Desid. Laudabilis est ista vestrorum mansuetudo eximia.

Tresont. Ecce tamen, quid etiam in contrarium teneamus, siue in Confessionibus nostris publicis, siue in earundem annotationibus. Damnamus manducationem carnalem Capharnaitarum, Pontificiorum, ubiquitariorum, includentium corpus Christi in pane. Damnamus transsubstantiationem & inclusionem: quia corpus Christi corporaliter manducari non potest citra flagitium & truculentiam. Pernegamus Sarcophagiam corporalem & cruentam, hoc est, ore corporali naturale Christi corpus ex virgine natum sumi in cœna. Eorum insaniam damnamus, qui asserunt sarcophagiam, id est, ore corporali sumi Christi corpus naturale, sanguinolentum sine ulla mutatione aut transsubstantiatione. Antropophagi aut Sarcophagi delirant, dum somniant panem quidem videri, & panem non mutari in corpus: tamen pane manducato, realiter & substantialiter corpus Christi ore corporali sumi.

Desid. Video vos in utramque partem paratos; neque nostræ genti in eo adversos, ut quæ idem neget & affirmet de iisdem, citra periculum mendacij, prout placet.

Tresont. Cum antedicta discretionem & τῆς ἀπορίας, & τῆς συννεπιστάσεως. Ignosces, quod his elegantissimè

trissimæ significationis nominibus utar. aliæ extra Græciam linguæ paria & aptiora nomina nobis non suppeditant quorum tamen posterius Cretismo valde affine cautè est usurpandum.

Conferentia VIII. inquit de articulis fundamentalibus.

T*Respon.* Iam multa satis, uti vides, à nostra fide, in Gentis vestræ gratiam removimus, ita ut nobiscum sentiendi & loquendi nulla in his possit esse difficultas. At major difficultas erit in positivè credendis articulis nostris fundamentalibus.

Desid. Fateor, me ad solum nomen positivè credendi exhorrescere. Vereor enim haud immeritò, ne omnis nostra tractatio in nihilum recidat, si quidem opportunum defuerit remedium: de quo tamen non omnem spem depono, postquam vestram hactenus in condescendendo expertus sum humanitatem.

Trespon. Mihi quidem hucusque nullum est perspectum remedium, quò vestræ Gentis infirmitati, adeo ad mera negativa credenda natæ & pronæ succurri possit: Non tamen ideo mihi persuadeo nullum inveniri posse. Tentemus. Ex nostrorum sententia, substantia credendorum est in Symbolo: id est, necesse est credere omnia, quæ nobis in Evangelio promittuntur, quorum summa in Symbolo Apostolico est. Ideo illud Symbolum ponitur uti fundamentum omnium nostrarum Confessionum.

Desid. Laudabiliter scribit enim vester Davenantius, ut mihi relatum est, Articulum, qui Apostolorum & primitivæ Ecclesiæ temporibus non fuit fundamentalis, nostris affirmationibus, altercationibus, anathematismis nunquam evasurum fundamentalem. Ep. st. ad Duræum.

Trespon. Sit itaque hæc prima & præcipua nostra cura,

cura, accuratè in hoc ipso Symbolo distinguere & secernere fundamentalia à non fundamentalibus: postquam enim in ijs consenserimus, reliqua oportebit exprimere paucis & clavis verbis, ut communi consensu statuminentur.

Desid. Ego nomine Domini Regis mei nequeo admittere totum Symbolum Apostolicum, ut fundamentale: continet enim multa affirmativa, quibus amplectendis noster non sufficit populus. At vero, nec mihi persuadeo, vos urgere fidem positivam totius Symboli. Nam totum servitium Dei consistit in duobus punctis, scilicet in benè faciendo & benè credendo. Et quidem summarium primi habemus in lege Dei, & secundi in Symbolo. At multi pervenerunt ad salutem, quibus tamen utriusque horum non fuit notitia, imò neutrius. Ecce Ionas non proposuit hæc omnia Ninivitis, quorum tamen conversioni testimonium reddit Iehova. Agnoscis, puto, sententiam Molinæi in Novit. Pap. lib. 1. cap. 22. Possem igitur sic colligere, secundum exiguitatem ingenii mei. Totum servitium Dei consistit in benè faciendo & benè credendo. Sicuti igitur juxta Protestantes, fideles benè faciunt, licet peccent mortaliter in omni opere; ita juxta Protestantes, debent fideles, censeri benè credere, etiamsi errent in singulis articulis fidei. Quo enim fundamento plus requireris ad benè credere, quam ad benè facere? sed hæc subtilia dimitto. Docet Molinæus, multos pervenisse ad salutem, qui non sciverunt totum Symbolum. Quonam igitur jure dicebas totum Symbolum esse necessarium & fundamentale? Liceat nobis pauper culis supra Ninivitas non onerari: liceat nobis post Molinæum ab essentialibus fidei dimittere, de quibus non constat, quod per Ionam sint prædicata: liceat nobis à necessitate Christianismi remo-

removere, quod Iudæis alijsque conversis non fuit necessarium.

Tresont. Distinguendum est, ut ante dixi, subtiliter, inter res necessarias: quia multa videntur esse multis necessaria, quæ tamen iuxta dictamen scripturarum, & sententiam nostrorum non sunt absolute talia.

Desid. Mitissima est, ut mihi relatum est, sententia Ioannis Cræcij, quæ certam concedit salutem, si quis veritatem de gratuita peccatorum remissione propter solius Christi meritum fuerit complexus. Tom. 1. Anti-Becan. contr. 3.

Tresont. Agnosco, facillimam esse sententiam, ad præscindendas plurimas difficultates.

Desid. Bene. Iam non diffido de ulteriore parresia nostra & syncretismo,

Conferentia 8. Adfert Psittacorum motiva pro societate Religionis cum Protestantibus.

D*esid.* Pono, ex Protestantium doctrina, tantam rem indubitatam, non subverti fundamentum fidei in omnibus, etiam si quis erraret in uno articulo fundamentalis. Paret id ipsum exemplo Apostolorum, qui errabant in articulo de resurrectione Christi, non intelligentes scripturas. Articulus erat fundamentalis; neque ideo oppositus error fundamentum evertibat in omnibus; quoniam credebant, Iesum esse verum Deum & hominem. Primum fideles errabant in articulo de Sanctorum communionem, utique necessario; quod Gentes ad eam non pertipere putarent; neque tamen propterea omnium articulorum fundamentum destruebant. Plurimum ex Patribus de adventu Christi ad iudicium etiam

punt, statuentes, ante extremum diem regnaturum mille annos in terris cum sanctis. Multi errarunt in articulo de vita æterna, negantes beatos videre faciem Dei ante extremum diem. Quis dicat evertisse fundamentum in omnibus articulis? vid. Crocium. comment. de August. confes. q. 2. c. 43.

Tresont. Confirmo id ipsum ex nostro Eilbrachto, qui licet teneat Lutheranos fundamentaliter errare in articulo de cœna Domini, eorundem tamen non refugit communionem. Epanorth. cap. 13. Confirmo etiam ex Scriptura; quia inter Corinthios erant, qui negabant mortuorum resurrectionem, quo non obstante vocat eos Apostolus sanctificatos in Christo Iesu. 1. Cor. 1. Confirmo insuper ab exemplo Galatarum, qui tenebant observationem Legis Mo-
saicæ cum Evangelio, esse necessariam; nec tamen ideo e fidelium numero tolluntur ab Apostolo. Gal. 1.

Desid. Qui subtilitatibus scholarum sunt assueti, possunt fortassis ex dictis probare, unionem & fraternitatem Religionis inter nos esse possibilem. Ego qui istis assuetus non sum, considerandum vobis propono, an Psttaci non potius indulgendum sit, ut uno solum articulo fundamentalis salvenrur potius, quam alii à vobis multum diversi Lutherani, Papistæ, &c. hi enim in plurimis vobis adversantur, & gravissimis detinentur, uti censeatis, erroribus. Psttaci autem in nullo errant, & vobis mille modis obsequuntur. Nolite ergo hoc negare genti nostræ, siquidem recte perspectam habeo benevolentiam vestram, qua universos complectimini. Deinde ex vestra sententia, non sunt ei neganda jura fraternitatis, qui citra malitiam apertam, & pervicaciam preconceptam negat articulum fundamentalem: ideoque non perspicio, qua ratione, qua æquitate

nobis societatem Religionis denegaretis, qui nullum profecto articulum fundamentalem negamus, nullum quoquo modo destruimus; licet pro tenuitate ingenii nostri unum illum articulum necessarium non assequamur.

Trefont. Iterum nimis crasse ista dicuntur. mallem subtilius ista considerari, nisi perviderem simplicitatem gentis vestræ, sane aliter procedendum putarem. Itaque quod res est, dicam, horreo Fraternitatem reculare. Non est de trivio ista consideratio, fraternitatem reculare; nec tamen audeo eam suscipere ob futura variorum minus æqua iudicia.

Desid. Illa debemus audientes non audire.

Trefont. Sed nostra Religio malè audiet, si Psittacos in societatem recipiamus nihil credentes.

Desid. Verbum, credere, uti vobis perspectissimum est, varie accipitur. In confessionibus vestris aperte dicitis, vos credere non esse invocandos sanctos demortuos; vos credere, non esse purgatorium; & alia similia non pauca. Et tamen ibi verus & genuinus sensus est, quod non credatis invocandos esse demortuos, quod non credatis esse purgatorium, & sic de aliis. In plurimis illis Psittaci vobiscum credent, & subscribent propriis terminis vestrarum Confessionum, sine omni dolo & fraude, cuius non sunt capaces. Imo unum eundemq; vobiscum laudabunt Deum verum, moniti non in vanum à Psalmista Regio Psalm. 149. 10. Laudate Dominum volucres pennatæ. Eidem benedicent provocati in trium puerorum cantico. Dan. 3. Benedicite omnes volucres cæli Domino. Ideoq; cum Psalm. 36. 7. dicimus, Homines & iumenta salvabis Domine, quæ admodum multiplicasti misericordiam tuam Deus. Absit ut Psittacos recipiatis nihil credentes, nihil pro honore Dei facientes, quin imo laudent eum sine prece-

to, quod Protestantes agnoscunt ; se non posse.

Tresont. Si Lutheranus aut Papista, aut alius eodem ageret nobiscum, vereretur ut patientia & humanitas salva subsisteret. At vestrae simplicitati ignoscendum est amplius, Rogo itaque ut citra conclusionem fraternitatis, de qua non admissa solenniter protestor, interim de aliis agamus, ut liceat omnibus auditis & ponderatis ad Clementissimum Dominum meum referre, eiusdemque tum sublimem, tum salutarem pro veritate & æquitate resolutionem amplecti, quoniam instar Dei exaltata est eius sapientia super sapientiam nostram.

Desid. Priusquam hoc supremum oraculum adætur, tentemus alia via, quod intendimus.

Tresont. Fiar.

Conferentia IX. statuit concordiam de Descensu Christi ad inferos.

D*Desid.* Pono tanquam indubitatum fundamentum, uno articulo fidei fundamentali credito, nobis posse salutem contingere : illud enim ex vestra doctrina fluit Atqui Psittaci eadem porrò ratione credunt Descensum Christi ad inferos, quàm vestris creditur. Proindeq; nihil illis deesse existimo, quo minus salutis, atque exinde vestrae fraternitatis sint capaces.

Tresont. Esse eum articulum fundamentalem lubens agnosco cum nostris Doctoribus. Sensum eius à Magistris Protestantibus aliter atque aliter accipi nullum est dubium, Sed quidquid sit de eo, quomodo dicis Psittacos credere istum articulum?

Desid. Dico cum hospite vestro, Marco Antonio de Domnis lib, 7. Repub; Eccl. cap. 12. Christum descendisse ad inferos, non negant Protestantes. Sed quis sit sensus huius articuli in nullo

in nullo articulo fidei invenitur, Fide enim non constat, quomodo Christus ad inferos descendit. Neque certum habemus, cum articulum semper in symbolo Apostolico lectum & recitatum fuisse. Huius articuli verum & genuinum sensum, neque Apostoli tradiderunt, neque Ecclesia definivit. Ita & Psttaci cum Protestantibus non negant Christum descendisse ad inferos: imo profitentur, se credere eum articulum corde vacuo, mente inani, utpote sensu Apostolico & Ecclesiastico destitutum.

Tresont. Haberm, quæ dictis tuis opponerem: sed modicæ difficultates non impediunt fraternitatem nostram, quoniam valde a vco Indiam Austrolem nostræ Ecclesiæ adiungere, uti orientalem & occidentalem suæ iunxerunt Papistæ.

Conferentia X. statuit concordiam in articulo de Ecclesia.

D*esid.* Ecce, quàm liberaliter vobiscum agam. Poterat mihi per vestram doctrinam, fides unius articuli fundamentalis sufficere: sed dabitur fortasse modus, quo Psttaci eandem vobiscum credant Ecclesiam Catholicam.

Tresont. Ego quidem id ipsum optarem, pro bono communionis Ecclesiasticæ promovendæ: sed id fieri posse mihi non persuadeo.

Desid. P. ænominatus Marcus Antonius nobis aperit viam loco allegato; nam illi, ad fidem non perit, quinam Ecclesiam constituent. Nos proinde cum ipso profitebimur vocaliter, Ecclesiam Catholicam, excludentes à fide nostra notitiam membrorum Ecclesiæ, ut quæ pertineat ad disputabilia, & peritiam scholasticam.

Tresont. Video nostrum quondam hospitem
haud

haud modicè allaborasse statuendæ inter nos fraternitati. Profecto, si ad fidem non pertinet, esse certum cætum, qui sit Ecclesia; sufficiet verba illa, de Ecclesia Catholica, exterius profiteri, ut communio Ecclesiastica inter nos coalescat.

Conferentia XI. adfert concordiam etiam in articulo de Communionis Sanctorum.

Desid. Nos etiam possumus cum Protestantibus articulum de Communione Sanctorum profiteri. Nam, ut præclare explicat Marcus Antonius loco allegato; sanctorum communionem satis credit, qui assentitur fideles omnes (nescio quos, aut ubi terrarum commorantes,) in una Ecclesia, una communione charitatis, & Sacramentorum colligatos.

Tresont. Num Psittaci possunt in hoc assentiri quod manifestè positivum est?

Desid. Non possemus, si esset merè positivum. Sed quia articulus ille sequitur Ecclesiam vagam, nullatenus determinatam; possumus de tali Ecclesia quidlibet admittere, tanquam in vago, & interminato fundatam subiecto.

Tresont. Utinam gravior nulla superesset difficultas! pateret in hac parte locus consentiendi.

Conferentia XII. ostendit articulum de Remissione peccatorum non esse fundamentalem.

Desid. Sentio, mi frater, quò repdas. Difficultatem tibi persuades futuram in articulo viciæ po de Remissione peccatorum. Ibi tamen nulla est, uti videbis.

Tresont. Quomodo ibi nulla difficultas esset, ubi est

ubi est basis totius Reformationis nostræ.

Desid. Vestri docent, fidelium infantibus non imputari peccatum originis, eosdemque sine baptismo regenerari. Gomarus in Synod. Dordrecht. ad art. 1. Psittacis nequit imputari peccatum originis, quod nullum in Adamo contraxerunt: ideoque nec indigent eius remissione. Tantundem dico de alijs quibuscunque peccatis: nam gens nostra actuales transgressiones omninò ignorat, nec est earum capax.

Trefont. Ista ratione non male probas, articulum de remissione peccatorum ad populum vestrum non pertinere; sed hoc non sufficit ad communem inter nos fidem.

Desid. Iuxta doctrinam Protestantium requiritur, ut fideles certâ fide credant, sibi remissa esse peccata. Amesius. Bellarm. enerv. lib. 6. cap. 1. Thes. 3. juxta eandem doctrinam, etiam viri sancti hæsitant de favore Dei, quando graviore premunt adversitates. Calvinus lib. 3. instit. cap. 2 §. 17. juxta eandem doctrinam non omnes justificati statim ab initio suæ justificationis sunt certi de remissione peccatorum; Ames. ibid. thes. 13. Consequenter, certâ fide credere, sibi remissa esse peccata est necessarium & non necessarium ad tenendum articulum de remissione peccatorum; nec non ad obtinendam justificationem. Quocirca, si verus sensus est necessarius & non necessarius in eo articulo, nequit profecto esse fundamentalis; nisi omnes illos à vestra fraternitate arceatis, qui agnoscunt se præfata certitudine destitui. Sublata positi sensus necessitate, non tantum removeri potest iste articulus ab essentia fidei; sed etiam propter involutam contradictionem, à Psittacorum prolapia, ad similitudinem negationum acceptari.

Trefont.

Tresfont. Antea nimis crassè & quasi ruditer Tua fraternitas loquebatur, modò fere nimis subtiliter, Nos odimus subtilitates vexantes. Alias non contemnenda est ista consideratio; multam nostræ concordiae facilitatem allatura. At vero, cum agatur de summa rei, finalem determinationem celsissimo Protectori reservemus, qui tanquam spiritalis iudicat omnia.

Conferentia XIII. exhibet consensum in rebus morum.

D*esid.* Cum hucusque non sit infelix conferentiarum nostrarum de credendis progressus, libet porro quærere, an in moribus fidelium bonis vel malis hæreat aliquod gravamen, propter quod à Fraternitate vestra nostra Gens excludatur. Breviter dicam. Video hic non optimos vigere mores; quamvis mihi persuadeam Celsissimum Protectorem optare integerrimos.

Tresfont. Fieri non potest, quin in Fdelium moribus reperiatur, quod meritò reprehendas, dum modicus defectus per consuetudinem in plures derivatur.

Claudo vel uni si propinquus manseris.

Disces & ipse claudicare protinus.

Si vel paucis mensibus nobiscum subsistas, disces ab Aulicis, dicere, quod non cogitas; disces à militibus, rhedariis, & nautis per centena millia Sacramenta iurare, etiamsi nullum credas; disces à rerum novarum cupidis facta evulgare, etiamsi nescias.

Desid. Talibus moribus etiam apti sunt Pfitati nostri, dicunt indies, quod nesciunt.

Tresfont. Sed quod caput rei est, acutissimi viri ingenii Ioannes Calvinus, docuit nihil esse in moribus vitiosum, quod sufficiat negandæ fraternitati. Iustit. lib. 4. capite 1. §. 13. 16. n. 18.

Desid.

Desid. Per Iehovam, subtilissimè & nostro populo accommodatissimè. Quamvis, igitur in Pſittacis nostris mores antiquorum Christianorum non invenias, præstant tamen aliquantulum in hac parte Protestantibus, qui optimos quosvis suorum actus peccata nuncupant. Id mei Pſittaci non faciunt.

Tresont. Vinam in reliquis non foret maior difficultas, etiam nunc dexteram societatis porrigam,

*Conferentia XIV. de ritibus Ecclesiæ statuto
concordiam.*

D*esid.* De ritibus Ecclesiæ & jeuniis tenent Protestantes, opinionem, acquirendæ per ea iustitiæ gratiæ aut meriti, plane removendam esse. Conf. Argent. cap. 2^a

Tresont. Addimus, & obligationem conscientiæ ab iis observationibus esse excludendam; omnemque persuasionem, quasi per eiusmodi opera Deus cole-retur. Conf. Belgica. art. 32.

Desid. Hæc omnia sunt aperte negativa, ideoque à nostra progenie non sunt aliena. Negabimus vobiscum contra Pontificios & quoslibet alios, Deum sive ieiunio, sive humanis ritibus colendum esse; negabimus ullius conscientiam istis obligari posse, maxime si qui fuerint nobis similes, conscientia destituti; negabimus etiam, quod istis vel iustitia vel gratia, vel meritum obtineatur, de quibus omnibus nulla nobis est sollicitudo.

Tresont. Sed interim aliqui ritus in Ecclesia observandi sunt pro decore & ordine.

Desid. Vos ipsi docetis, varios posse esse ritus particularium Ecclesiarum, pro arbitrio cuiuscunque determinandas. Vestros nolis nobis obtrusos,

de libertate nostræ præjudices. Itaque iustum est, ne nostris Ecclesiis relinquas dispositionem rituum; in quibus spondeo nihil futurum, quod adversetur Evangelio.

Tresont. Placet.

Conferentia XV. obtinet consensum de communione sub utraque specie.

T*resont.* At verò ingens est difficultas de communione sub utraque specie; nec ullatenus video, qua ratione hanc superemus, quod sit præceptum Christi affirmativum.

Desid. Ne despondeas animo, mi frater. Si quid intelligo, ipsi Protestantes; in hac materia, viam sternunt optatissimæ concordie.

Tresont. Aveo audire, quid proferas in eam rem opportunum.

Desid. Nonne docent Protestantes, pro vino usum aquæ esse licitum?

Tresont. Docent id licere in casu necessitatis, quæ legem, quomodo potest, servat. Molinæus. Novit. Papist. cont. 12.

Desid. Potestne casus necessitatis aliam materiã Sacramento substituere, à Christo non institutam? Si id non possit, in tali casu dabitur communio sub una specie; altera nimirum ad Sacramentum non spectante. Adest etiam aliud fundamentum in hac causa peremptorium. Nonne docetis, abstemiis posse administrari communionem sub una sola specie panis? Molin. loc. cit. Disciplin. Eccl. Gall. cap. 12. art. 7.

Tresont. Tace, tace; ne hoc quisquam inaudiat Papista; qui inde concluderet, non esse præceptum divinum communicandi sub utraque specie.

Desid.

Desid. Papistæ sunt ignorantes. Sic enim Dialecticè concludendum foret : Ergo est, & non est Evangelicis præceptum divinum communicandi sub utraque. Quæ conclusio habet verissimum dogma, Protestantibus nobisque Pſittacis commune. Protestantes libenter versantur in contradictionibus, & nostra regio amplectitur fide pauperrima formales contradictiones; tanquam non entia.

Trefont. Audi mysterium: inter privatos nostros parietes tenemus, non esse præceptum Christi indispensable, ut omnes communicent sub utraque specie, tum propter abstemios nostros, tum propter casus necessitatis hinc inde occurrentes : imò in quibusdam locis multi fideles nunquam communicant, quos tamen propterea in infirmitatibus & morbis non deserimus, quamvis iisdem nec tunc Sacramentum administremus.

Desid. Bene habet : & Pſittaci vobiscum credent, non esse præceptum unicuique fideli sub utraque specie communicandi; quia hoc merè negativum est. Clamabunt interim (in vestri gratiam) adversus Pontificios, esse præceptum; etsi nihil intelligant. Siquidem verò Pſittacis locum inter vestros fideles concesseris, qui citra contemptum abstinent à communione; nihil erit, quod ab iis ulterius desideres.

Trefont. Sanè. præter opinionem meam in eandem pervenimus sententiam.

Conferentia XVI. concordiam præstat de numero Sacramentorum.

D*Esid.* Torset me multum illa cogitatio, quomodo in numero Sacramentorum statui possit concordia; neque inveni modum elabendi à positiv

tiva affirmatione , donec sensum didici popularis vestri, patrisq; Protestantium Ioannis VViclef, in hunc modum protestantis: Quantum ad istam materiam, de signis, sum pauper animo; cum cognosco, quod multa dicta in ista materia habent nimis debile fundamentum, & propter aggregationem ac institutionem in terminis, difficile est loquentibus habere viam inexpugnabilem veritatis. Non enim video, quin quælibet creatura sensibilis sit realiter sacramentum, quia signum à Deo institutum, ut rem sacram insensibilem significet, cuiusmodi sunt Creator & creatio, & gratia Creatoris. Nec didici picatias, ex quibus picatiis adiectis hoc nomen sacramentum, limitari debet univocè ad hæc septem. Ideo desperavi de univocatione. Dialog. lib. 4. cap. 1.

Tresont. Præclarus fuit iste Doctor in nostra regione, & senior assidentium ad unam mensam **Amsterdam**, qui hic & Amstelodami & alibi sunt excusi vivis iconismis. seniore[m] illo non agnovit hætenus nostra religio.

Desid. Præclara quoque eius sententia haud parum momenti allatura fraternitati nostræ videtur. Idcirco idem senior & Doctor vester Ioan. VViclef per omnem modum Magnus in regione nostra Patronus Pſittacorum habebitur. Agnoscit, se in materia de sacramentis esse pauperem animo: & nos paupertatem animi nostri profite[m]ur. Agnoscit, in ista materia difficile esse, ut quis habeat viam inexpugnabilem veritatis; ideoque desperat de univocatione. Nos, quia desperamus de professione cuiuscunque numeri, nihil solliciti sumus de via veritatis nobis ignota. O magnum virum & merito venerabilem, qui quamlibet
C creatu-

creaturam sensibilem realiter facit Sacramentum. Totā igitur nostra regio, quot habet Psitracos, tot habet Sacramenta: & ego Desiderius sum realiter à parte rei, pure, simpliciter & absolute Sacramentum; quia sum signum à Deo institutum, ut rem sacram insensibilem significem. Quam gratiam referemus tanto viro, nisi ut eum dicamus Sacramentum Sacramentorum, quod ipse de Christo asseverat? Dialog. lib. 4. cap. 11.

Tresont. Etsi, nescio quid tergi-versationis sentiam in spiritu meo, quoad societatem & fraternitatem vestram adeo dissitam, fateor tamen, me etiā astringi occulte & urgeri talibus dictis senioris nostri, ad exhibendam tibi Societatis Ecclesiasticæ dexteram; ut in hac materia in posterum non sit magna difficultas: quamvis enim soleamus duo tantum Sacramenta agnoscere; Calvinus tamē non repugnat quin impositio manuum, quæ fit in introducendis veteris Presbyteris & Ministris Ecclesiæ in eorum statum, recipiatur tanquam Sacramentum. Instit. lib. 4. cap. 19. § 28.

Desid. Si Protestantibus licet pauciora credere, quàm Calvinus crediderit Sacramenta, neque hic propter excessum, aut illi propter defectū sunt condemnabiles tanquā errantes in articulo fundamētali integrū nobis erit, omnē sacramentorum numerū, omniaq; Sacramēta ignorare; nisi quod cum VViclefo, secundum paupertatem ingenii nostri, nos ipsos, fratresque nostros Protestantes habeamus pro Sacramentis. tunc minus errabimus, quam qui solum duo aut tria agnoscant.

Conferentia XVII. concordiam exhibet de necessitate Baptismi.

D*esid.* Necessè non foret, post prædicta, de Sacramentis in particulari agere, visum tamen est ostendere sententiam Protestantium, circa necessitatem baptismi, nullum fraternitati nostræ posse creare præiudicium, ne quis malignus garriat, fraternitatem nostram, non debite examinatis fundamentis coalluisse.

Tresont. Operæ pretium id erit, ad occludendum ora loquentium iniqua, à quibus multum patimur, cum talia, ut modo nos facimus, concordamus. quidam enim nobis etiam ex talibus occasionibus, & Turcismum & Atheismum, & graviora exprobrarunt invitis.

Desid. Condoleo. sed pergamus. Nota est sententia Protestantium, infantibus fidelium non imputari originale peccatum, atque eosdem ante baptismum regenerari. Plerique vero, qui per fraternitatem cum Protestantibus pro fidelibus habendi sunt, nulla ratione indigent baptismo, ut qui orti ex genere Præ-Adamitico, peccatum originale non contraxerunt, ideoque nec indigent regeneratione, Interim non contemnunt baptismum, si quidem Protestantes existiment, se eo indigere.

Tresont. Non est ex fide certum apud nos, omnes fidelium infantes, etiam tirè baptizatos, & morientes sine peccatis actualibus aut regenerari, aut salvari. Gomarus in Synodo Dortrechtana ad art. 7.

Desid. Ita & de nobis sentite: nam quod usū rationis attinet, gens nostra similis est infantibus. Non erit articulus fidei, an quisquam de genere nostro sal-

vetur aut regeneretur: sicut enim Protestantibus id licet sentire de infantibus baptizatis, multo magis censebunt tenendum esse de Psittacis.

Tresont. Dicant alii, quod volent: ego populum vestrum ex hoc capite a fraternitate nostra non possum excludere, si alii id volent. Ego author excludendi esse non possum.

Conferentia XVIII. concordiam prætendit de Cœna Domini.

D*esid.* Cum Lutheranis, in hac parte, nequeunt Psittaci consentire, qui affirmant, corpus & sanguinem Domini, in eiusdem S. Cœna reperiri. Nobis placet, quod scripsit Ioannes VViclef; mentem Catholici non capere, quod panis sit corpus Christi. Dialog. lib. 4. cap. 7.

Tresont. Illa etiamnum est sententia Protestantium Angliæ, qui cum Calvino asserunt, sublimius esse in cœna nostra arcanum, quam ut vel ingenio comprehendi, vel enarrari verbis queat. Instit. lib. 4. cap. 17. §. 32.

Desid. Quomodo conveniet inter VViclefum & Calvinum, si utriusque sententiam tenetis. VViclefo sufficit, ad non credendam realem præsentiam sub pane, vel eius specie, quod mens Catholici eam non capiat: Calvinus vult credi sublime arcanum in sua cœna, etiamsi illud arcanum nemo possit comprehendere, nemo eloqui. Ego assentior VViclefo, non esse credendum prætensum mysterium, quando id mens Catholici non capit: & sic rejicio sublime Calvinii arcanum, quod ipse cognoscit se non capere.

Tresont. Sed tunc nobiscum credere non poteritis, Christum arcana & incomprehensibili sua virtute nos nutrire & vivificare sui corporis & sanguinis sub-

substãtia, per fidẽ apprehẽsa. confessio Gallica art. 36

Desid. Id revera credere non possumus: sed non credo id requiri ad propriam & distinctam essentiam eius Sacramenti.

Tresont. Quã ducetis ratione?

Desid. Quod fratres nostri Lutherani essentiam istius Sacramenti in eo non constituent. Quã propter licebit nobis cũ Lutheranis id ipsum etiã pernegare.

Tresont. Licebit; si Lutheranorum sententiam tenueritis?

Desid. Vobisne auctoribus Plittaci tenebunt falsam Lutheranorum sententiam?

Tresont. Neutiquam: sed oportet alterutram tenere, ne destituamini eo sacramento.

Desid. Imò vero præstat neutrã tenere: id enim nobis licet, dum vobiscum sententiã Lutheranorum, & cum Lutheranis vestram sententiã repudiamus: vel potius dum Neutrales neutram repudiamus, sed ab utrisq; docti neutram admittimus. Porro destitui eo Sacramento apud vos tanti non est, ut quœquam ex eo capite à fraternitate & sacris vestris removeatis: nam fratres nostri Plittaci, ex Holslandia redeuntes, constanter referunt, plurimos in eis provinciis omni sua vita abstinere à cœna, qui tamen inter Reformatos computantur.

Tresont. Constat de facto: sed illi recipiuntur, ut fratres infirmi & debiles.

Desid. Abunde satis est genti nostræ, si pari ratione detur ei ad fraternitatem Protestantium pervenire. Imo est scrupulus quidam, nos deterrens à vestræ cœnæ communione.

Tresont. Si iustus sit scrupulus, ipse auctor ero, ut salva fraternitate nostra abstinere à cœna Domini.

Desid. Iudicium tibi permitto. Legitur apud Paulum. 1. Cor. cap. 11. Probet autẽ seipsum homo: & sic

de pane illo edat, & de calice bibat. Qui enim manducat vel bibit indignè: iudicium sibi manducat & bibit, non dijudicans corpus Domini. Ideo inter vos multi infirmi & imbeciles, & dormiunt muli.

Tresont. Quis tibi natus est scrupulus per eum textum?

Desid. Dicam. Vos dicitis, corpus Domini tantū manducari à veris fidelibus per fidem: at sic nemo est, qui indignè manducet corpus Domini; nemo, qui iudicium sibi manducet & bibat. Clarissimum est hoc. Deinde dicitis, indignè manducari; quia quod symbolis offertur, vitio susipientis non accipitur; sed illud à parte rei, non est indignè manducare, sed non manducare: & ideo revera actum positivum convertitis in negativum. Bene, Bene, quia hanc consuetudinem tenentes in aliis fidei rebus, genti Pluracorum ingens præstatis obsequium. Accedit, quod omninò terreantur conscientia nostræ gravi illo Apostoli decreto: atque imprimis miramur, tantam Protestantium multitudinem in his Regnis ad cœnam vestrâ accedere. Docetis, neminè digne manducare, neminem digne bibere, nisi verè fidelem, & verè iustificatum; docetis, nullos iustificari, nisi electos ad vitam æternam. Ita singulis ad cœnam vestram accedentibus debet constare de sua iustificatione & electione. Iterum docetis, fidelibus non constare de sua electione per causam, neque evidenter: imo certitudinem de electione non esse semper firmam, dum fideles peccata sua recogitantes, magnam patiuntur contrarii formidinem. Ex quibus videtur dicendum, multò maximam partem ad cœnam indignè accedere, quod rari sint, quibus de sua prædestinatione sufficienter constet, Quapropter genti nostræ non est verè

gendum vicio, quod tali scrupulo ducta à cœna vestra censear, citra omnem contemptum (à quo nos Jehova custodiat, & nosti nos abhorrere) abstinent-
dum.

Tresont. Non audeo super isto scrupulo, inconsulto Celsissimo Protectore, iudicium meum proferre. Interim vobis integrum est, aliorum exemplo, à cœna nostra emanere.

Conferentia XIX. habet concordiam de Sacramento Ministerii.

D*Esid.* Scio à Pontificiis urgeri Sacramentum Ministerii Ecclesiastici, quod ipsi vocant ordinis. Sed cum illis non est Regi meo tractandum de Societate Religionis, quorum doctrina plurimis abundat affirmativis, fere idem iudicabam de Protestantibus, cum legerem, Ministerium Ecclesiasticum esse Sacramentum, & duobus aliis Sacramentis non annumerari, quod non sit commune omnibus fidelibus, Calvinus. Instit. lib. 4. cap. 19. §. 28. magis etiam hærebam, cum viderem Protestantes Galliarum confiteri duo solum Sacramenta communia toti Ecclesiarum, confess. Gall. art. 35. quibus verbis videbantur innuere, esse aliud Sacramentum toti Ecclesiarum non commune. At verò non modico mihi erat solatio, quod nihil de eo Sacramento invenirem in alijs Protestantium confessionibus: imo quod illarum, duobus Sacramentis enumeratis, reliqua à numero Sacramentorum excluderent, vel etiam expresse reprobarent: atque ex illa varietate speravi non obfuturam præfatam doctrinam nostrarum concordiarum.

Tresont. Esto bono animo; nihil Calvinii nostri sententia retardabit fraternitatem optatissimam. Inind quidem Reformationis idem contigit Luthero

quod Calvino, ut plura agnoscerent Sacramēta. Nec improbabilibus, ex sacro textu, Calvinus movebatur argumentis. Cum autem Deus paulatim Reformatos lumine majori illustraret; non potuerunt in Verbo Dei invenire sufficiens fundamentum, unde Sacramentum ministerij debitè confirmarent: ideoque illud ~~hanc~~ immeritò à numero Sacramentorum eliminarunt; existimantes sibi licere, quod Calvino licuerat, fidem scilicet de uno Sacramento deponere, postquam Calvinus priorem suam fidem de quatuor alijs Sacramentis rejecerat.

Desid. Perplacet mihi ille tuus discursus: quid enim impedit, quò minus dicamus & Psittacos paricum Protestantibus lumine illustratos, ad non inveniendum in sacris literis, quod Calvinus existimat se invenisse; proindeque ad reiiciendum, quod ille tenuit? Hoc verè Psittaco-Evangelicum est, tantà: superni luminis claritate circumfundi, ~~ut non~~ videas, quod alij vident, ut non intelligas, quod alij intelligunt, ut non invenias, quod alij inveniunt; ut reiicias quod ab alijs defenditur; ut condemnes, quod ab alijs creditur. Miror quidem sæpè, tantum beneficium à Deo quibusdam Europæis esse concessum ad restaurandas, per detractionem calcis & lapidum, Ecclesiæ collapsæ ruinas. Sed majus aliquod donum genti nostræ concessum est; nam quamvis ingenti suo bono multa Reformati non videant, quæ vel Lutherani, vel Arminiani, vel Pontificij vident: nos tamen potiore instructi claritate, ne quidem illas paucissimas Reformatorum affirmationes de rebus fundamentalibus (præterquam quod commodè ad captum nostrum aliqua explicentur) videmus: moderatione vero Christianis Protestantibus digna ipsos superamus Reformatos, neminem ob quasvis affirma-

ationes aut negationes privato nostro iudicio condemnantes. illud unice observando, ne quis nostrum, quantolibet fuerit ignorantiae & inscitiae fulgore conspicuus, ad cuiuscunque condemnationem prorumpat.

Tresfont. Nimiae sunt illae populi tui laudes. Quidquid tamen de ijs sit, revertamur in viam. Licet tibi non credere Sacramentum ministerij Ecclesiastici; dummodo ex eo capite non condemnes Calvinum: cuius tantam praesumimus charitatem, ut si viveret, nos ob rejectum istud Sacramentum neutiquam condemnaret; licet ex nostris sint, qui condemnent Pontificios erroris fundamentalis, ob negatam in S. Coena substantiam panis.

Desid. Majus utique est, rejicere integrum Sacramentum, quam hoc negare, quod vos dicitis, partem Sacramenti. Deberent illi homines vel praesumptam Calvini charitatem sequi, vel vereri simile Calvini iudicium. Nos ipsum Calvinum charitate superabimus, dum licet non credere istud Sacramentum.

Tresfont. Piam illam mentem laudarem, sed metu ne à Papistis irridear, solent enim id obsequij nobis non rogantibus, in huiusmodi charitatis tractatibus exhibere.

Conferentia XX. habet concordiam de iustificatione.

D*Esid.* Aegrè quidem pervenimus ad concordiam de iustificatione, Protestantibus admirandam quandam fidem hoc loco proponentibus, quam praeter Sibyllam, nemo explicet. Scio vestros hanc doctrinam vocare gravissimam & fundamentalem

lem; eandemque non unâ constare affirmatione, cuius nos nullo unquam tempore erimus capaces: ideoque in hac causa omni consilio destitutus sum.

Tresont. Ego superioribus diebus hanc materiam ruminans, primum totus hærebam; exinde ancipitis eram animi, nescio quam viam elabendi inventurus, dum plures se offerrent non planè securæ; tandem inveni ex nostris virum, qui sese ducem præberet ad stabiliendam concordiam nostram in hac re omnium difficillimâ.

Desid. Quis ille est?

Tresont. Est Ioannes Crocius, qui scribit, non fuisse causam separationis à Pontificiis, quod aliter sentirent, quam Reformati de formali justificationis causa. De Schism. p. 404.

Desid. Magni viri maximum testimonium, licebat ergo Pontificijs sententiam Reformatorum de formali justificationis causa non tenere, salvâ cum Reformatioribus fraternitate.

Tresont. Licebat,

Desid. Psittacis eodem jure idem licebit, sine præjudicio fraternitatis cum Protestantibus.

Tresont. Rectè concludis. Sed amplius est, quod pro nostra concordia dicit idem Crocius. Etsi verò, inquit, reales, eæque graves sint de justificatione controversiæ, non tamen propter illas nostri secessissent, si ipsis licuisset liberè veritatem docere atque profiteri. Ibid. pag. 440.

Desid. Ingens revera beneficium: licebit enim Protestantibus, nihil adversantibus Psittacis, liberè sententiam suam, de gravibus & realibus illis, de justificatione controversis, docere atque profiteri; dummodo nostram fraternitatem non aversentur. Neque enim æquum est, ut nos Pontificiis postponant; ab illis læsi, à nostris beneficijs affecti:

illis

illis fortiter contradicentibus, nobis tantum, ob defectum capacitatis, sublimes illas speculationes non penetrantibus, ideoque nec credentibus.

Tresont. Nullum est periculum, ne ex hoc capite à fraternitate nostra excludamini; posteaquam tantum vobis inveni patronum.

*Conferentia XXI. de ministris Ecclesiæ statuit
Concordiam.*

D*esid.* De ministris Ecclesiæ optatum spero inter nos concentum. Nosti præcedentibus temporibus in hoc Regno fuisse Episcopos: & tunc communiter fuisse creditum, Episcopos jure divino esse superiores alijs Ecclesiæ ministris; quamvis in ipsa Anglia non pauci cum ultra-marinis Protestantibus contrarium sentirent.

Tresont. Apud nos non est de fide certum, an Episcopus jure divino illam superioritatem habeat. Imò eliminatis ex hac Republica Episcopis, propemodum de fide certum est, ministros Ecclesiæ esse inter se æquales.

Desid. Nos pro æqualitate vel inæqualitate litem non movebimus: toti enim abhorremus à dissensionibus. Sufficit nobis de utrâque parte sententiam esse liberam: ideoque nos omnem inæqualitatem negabimus.

Tresont. Id vobis licet.

Desid. Sed nec Senioribus indigemus: cum enim Senior idem sit, qui Presbyter; & Presbyter idem sit, qui Episcopus; periculosum est admodum Seniores constituere, à quibus verendum sit, ne dignitatem Episcopalem, reliquis Ecclesiæ ministris supereminentem, magno Protestantium incommodo resuscitent.

Tresont. Nihil inde est periculi: quia Seniores inter nostros non sunt participes impositionis manu-
um,

um, & habentur tanquam iudices Consistorij ministris inferiores. Discipl. Gall. cap 3. art. 1.

Desid. Non capio quidem, quomodo Episcopi illi & Presbyteri, quos Seniores nuncupatis, siue impositione manuum ad tantam dignitatem eleventur. Hoc tamen ipsum, quod non consecrerentur per impositionem manuum, manifestè ostendit, Ecclesiam nostram istis non usquequaque indigere; nec propter ipsorum defectum, carere re aliqua ad directionem Ecclesiæ necessariâ.

Trefont. Nos Ecclesiis vestris non obtrudemus Seniores; dummodo in nostris Ecclesiis constitutionem Seniorum non reprehendatis.

Desid. Absit, peramande frater, absit, ut aliquid in Ecclesiis vestris reprehendamus; licet multa habeatis, quæ captum nostrum, & omnem rectam rationem longè superent, vel potius evertant. Sed tanto nobis rationis egentissimis estis cariores, secundum illud simile simili &c.

Trefont. Sed necesse est, ut habeatis ministros, siquidè perfecta inter nos debeat stabiliri fraternitas.

Desid. In quem finem?

Trefont. Ut publicè doceatur Evangelium.

Desid. Si ministri requirerentur, ut publicè sonaret doctrina Evangelij, possent etiam ex nostris constitui, qui publicè non pauca de Evangelio loquerentur; sed docere gens nostra non didicit. Possent quidem ex vestris assumi (ut olim dicuntur fecisse Waldensium reliquias) ad instruendum populum nostrum, siue per negativa, siue per contradictoria, siue etiam per affirmativa sine mente profitenda; nisi domi vestræ nasceretur remedium.

Trefont. Quodnam illud?

Desid. Patronus Angliæ Molinæus scribit, paucis articulis totam pietatem Christianam comprehen-

di, quique tam evidenter in S. Scriptura elucet, ut nullā indigeant interpretatione. Novum du Papis. lib. 1. cap. 21. & 22.

Treson. Quid inde conficis.

Desid. Inde concludo, non esse necessarium ministerium Ecclesiasticum: quid enim opus est, interpretando docere, explicando inculcare ministros, quod nec interpretatum, nec explicatum à quovis fidei intelligitur?

Treson. Hoc idem frequenter ingeminat Celsissimus noster Protector; liberam cujusvis fidelis exhortationem modis omnibus commendans. Ipse interim permittit, & protegit ordinem in Ecclesijs nostris constitutum.

Desid. Satis est. Licebit & Psittacis, posthabito ministerio Ecclesiastico, ordinem Ecclesiarum vestrarum permittentibus, sibi vivere, & quandoque ad communes laudes sub dio convenire.

Treson. Celsissimus Protector non erit vobis in hoc contrarius.

Desid. Sed nec vos rationabiliter potestis esse contrarii.

Treson. Quo fundamento?

Desid. Quia, si res debite examinetur, etiam vos caretis legitimo ministerio. Docetis, baptismum sine vocatione administratum, esse nullum. Discipl. Gall. cap. 11. art. 1. docetis, Pontificiorum vocationem nihil valere. Ibid. cap. 1. art. 2.

Treson. Docemus etiam, baptismum, in Papatu collatum, esse validum, Conf. Gall. art. 28. docemus, vocationem à Pontificiis acceptam, esse validam. Synop. disp. 42. n. 41.

Desid. Scio, vos ista docere, Psittacis gaudentibus & plaudentibus, imò, si voveris, idem vobiscum docentibus, quod contradictoriorum æque ac negativorum sint capaces. Sed quicquid sit, si Pontificij careant vocatione

catione, nullus fuerit baptismus in Ecclesia Pontificia primis Reformatoribus collatus, nullus etiā univ. veriorū Protestantium baptismus, omni vocationē olim deletā. Ita nihil est, unde doceatis, quēquā esse baptizandum; nihil, unde tueamini missionem ordinariam; nihil, unde recurratis ad missionem extraordinariam solam cui renunciastis. Crocius, Anti-Bec. tom. 2. contr. 12. sect. 12.

Tresont. Nihil opus est, hæc multum examinare. Multa à nostris, in hac materia, pro ratione temporis scripta sunt. Ego, iuxta prædicta, nulli auctot fuero, ut recusanti Ecclesiæ obtrudat Ministerium Ecclesiasticum.

Conferentia XXII. pacem adfert de observatione Legis Dei.

D*esid.* De observatione Legis Dei perbellè inter nos conveniet, dummodo sententia Protestantium recte proponatur. Nam licet pleraque sint negativa, videntur tamen Protestantes, in gratiam populi nostri etiam de affirmativis eam fovere sententiam, quæ nobis sit minime adversa; dum generaliter docent, legis observationem esse impossibilem.

Tresont. Neque potuit, aut potest ulla cōto legi Dei satisfacere, & hanc adimplere, ob imbecillitatem in carne nostra, ad extremum usque spiritum in nobis hærentem atque permanentem. Conf. Helv. art. 12. ideoque negamus, posse hominem ulla ratione legi Dei satisfacere, quæ perfectam obedientiam postulat. Conf. Angl.

Desid. Non poterat nobis convenientius exhiberi patrociniū. libenter enim vobiscum profitebimur, Legem Dei esse observatu impossibilem: & sufficere, si eam teneamus memoriter, scientes nos nullo modo ei posse satisfacere.

Tres.

Tresfont. Sed num-quid à veritate aliena est illa professio ; cum vos nequeatis falsum reddere testimonium.

Desid. Modicum non curat Prætor ; si nos in eo rei sumus , unde vos eximimini qui agnoscitis vos omnium præceptorum transgressores , nec tamen dici vultis vel homicidæ , vel adulteri : quod mei populares dici de se non exhorrescunt.

Tresfont. Ista ad subtiliorem pertinent discussionem. Alia est transgressio contra conscientiam, alia per imbecillitatem, & per negligentiam. Nobis interim nulla lis , quin lex Dei, etiam à renatis observari non possit.

Desid. Nec à nobis non renatis, qui etiam in hoc superamus renatos , quod sumptibus renascendi superfedemus.

Conferentia XXIII. de mutuo consensu statuit,
nullum iusti opus esse conforme præ-
cepto.

D*Desid.* Multum me torset etiam illa quæstio ; An iustus, quandoque aliquod opus exerceat, quod non sit peccatum ? Illi enim quæstioni, si affirmativè decideretur, videbam esse connexum, ut possibilis dicenda sit legis Dei observatio, ingenti fraternitatis Psittaco - Evangelicæ præiudicio. Nam si dicatur iustus in aliquo opere non peccare ; quod potest hoc instanti , vel momento temporis, poterit & sequenti, ac sic de reliquis ; nec ratio ulla supererit, cur censeatur, Legē Dei observare nō posse.

Tresfont. Recte iudicasti de istarum quæstionum connexionem. Ideo autem Protestantes, docentes impossibilem esse legis Dei observationem, consequenter statuunt, nullum iusti opus esse conforme præcepto.

Desid. Placet id mihi, quod quantum fieri potest,

test; doctrinam suam non subvertant. Sed audi, frater, quid dicat scriptura vestra de Hiobo: In omnibus his non peccavit Hiob, neque stultum aliquid contra Deum locutus est. Hiob. 1. In omnibus his non peccavit Hiob labiis suis. Hiob. 2. Dominus dixit ad Eliphaz Themaniten, iratus est furor meus in te, & induos amicos tuos, quoniam non estis locuti coram me rectum, sicut servus meus Hiob. Hiob. 4. Audi iterum de Zacharia & Elisabeth: erant iusti ambo ante Deum, incedentes in omnibus mandatis & Iustificationibus Domini sine querela. Luc. 1. Hæc & similia præsumptione mihi faciebant, ne fortè docereris, aliquid iusti opus esse conforme præcepto Dei.

Tresont. Solent talia Pontificii adducere; Sed constantia Protestantium, variis distinctionibus tuta, eiusmodi allegationibus non movetur. Maneat inter nos certum, nihil iustis esse laborandum de opere, quod sit conforme præcepto Dei.

Desid. Gratum Plittacis decretum.

Tresont. Et negative Evangelicum.

Conferentia XXIV. pacem adfert de distinctione personarum in Deo.

D*esid.* Multa premor anxietate circa distinctionem personarum in Deo; vereorque, ne unica hæc difficultas plenæ inter nos fraternitatis spem elidat.

Tresont. Illud i lem mihi videbatur, antequam optatissimi Indifferentistæ fratris nostri Doctoris Georgii Calixti sententiam vidissem ponde ratam in Synopsi Abrahami Calovii. Negat enim Calixtus opus esse modum, quo æternum numen aut existat aut operetur, cognosci, vel etiam ab iis, qui alios docent, exponi. disp. 3. Thes. 8.

Desid. Hoc quidem concernit modum divinæ existentiae & operationis : sed tota difficultas est in modo distinctionis personarum.

Tresont. Ab altero in alterum facilis est transitus. Iuxta Calovium, articulum fidei præcipuum de vera & reali distinctione personarum Trinitatis negat Calixtus, quia modalem, aut virtuales, aut eiusmodi aliquam distinctionem in SS. Trinitate statuit. Disp. 5. thes. 9.

Desid. Istud testimonium nobis est utile: nam Calixto præeunte, realem distinctionem non affirmavimus; & abstinemus à distinctione modali aut virtuali, vel alia quacunque, ne censura Caloviana nos feriat.

Tresont. Ferè affirmaverim, magnum illum Calixtum in spiritu suo syncretistico prævidisse hanc Regis tui Legationem pro societate Religionis obsequendam: adeo indulget populo ingenii tenuitate laboranti. Scribit enim; fundamentum eum fidei retinere, qui assequi nequeat, Christum unigenitum esse Dei Patris filium. Disp. 5. Thes. 12.

Desid. Meretur is in saltis regni nostri primum Regibus nostris locum. Nos profiteamur, nos assequi non posse, Christum unigenitum esse Dei Patris filium: & negamus cum Calixto, nos ideo, tanquam fundamentum fidei non retinentes à societate religionis Domestico-Calixtinæ excludendos.

Conferentia XXV. communi consensu de confessione statuit.

Tresont. Superata difficultate ista palmari, etiam de Confessione statuenda est concordia. Quæ enim fratres nostri Lutherani confessionem & absolutionem privatam in Ecclesiis suis, cum con-

formem verbo Dei, retinendam esse censeant: melius tamen Calvinus noster docet, privatæ confessionis originem ex putidis Papistarum lacunis prodidisse. Calovius. Disp. 29. Thes. 1.

Desid. In neganda confessione privata, habebis Psittacos obsequentes; ut quorum intellectus est perspicacissimus circa non-entia. At verò vobis inquisitionem relinquunt; num prodierit illa confessio ex sordibus Papalibus, vel sit verbo Dei conformis; super quo si ve cum fratribus vestris transigatis, si ve litem suspensam relinquatis, ad populum nostrum non pertinebit eius cura.

Tresont. Rectè iudicas. Sed quemadmodum de confessione statuimus, ita etiam de absolutione; neque enim externo Ministri verbo vis aliqua divina tribuenda est; quod nullus homo possit remittere peccata, uti cum nostris tradit Calixtus vir doctissimus, & in negationibus pro pace Ecclesiarum adinveniendis felicissimus. Calovius. Disp. 29. thes. j.

Desid. Nihil hinc difficile, ubi universa negativa. Nos nihil credemus de absolutione, qua non indigemus. Si Lutherani velint in cœlis solvi, quicquid in terris à verbi Ministro solvitur, non resistemus; dummodò nobis & fratribus nostris Angliæ Protestantibus, Presbyterianis, Independentibus, & Germanis nostris dilectissimis Calixtinis articulum illum positivum non obtrudant credendum.

Tresont. De Lutheranis exigua nobis cura est; plerique doctiores & politici Calixtisant, sicut nos Dominisamus: Calixtus autem & Marcus Antonius Psittacorum fraternitati aperuerunt latam

viam: ita paulatim per totam Europam

Rex vester habebit Religionis suæ
consortes plurimos.

*Conferentia XXVI. de discrimine ciborum
habet consensum.*

Desid. Audio, apud Pontificios, Græcos, Moscos aliosque servari abstinenciam à certis cibis per quædam determinata anni tempora: vidi tamen cum ingenti gaudio, in vestris Ecclesiis nihil simile reperiri.

Tresont. Merito discrimen ciborum à nostra communitate eliminavimus: quamvis enim Apostoli Act. 15. sanguinem & suffocatum prohibuerint; nostra tamen fragilitas eiusmodi abstinentias, libertati & commoditati Christianæ nocivas, haud patitur imponi liberis Christianis.

Desid. Verum, ieiunium nobis familiare est, quando omnes cibi nobis subtrahuntur; quod, pro dolor, frequenter nimis contingit. Interim non condemnamus abstinentes à certis cibis, contra quos nauseam habent: nec damnamus manducantes, quando nonnullæ reliquæ ad gentem nostram consueverunt pervenire.

Tresont. Condemnandi omninò forent, qui ex lege à quibusdam cibis abstinent, iuxta confessiones nostras: sed Marcus Antonius, & Calixtus, per abundantiam charitatis suæ liberant nos à necessitate condemnandi; salva cuiusvis libertate & commoditate.

*Conferentia XXVII. concordiam adfert de
Resurrectione.*

Tresont. Gravis superest difficultas, de corporum resurrectione; qua super habemus articulum Symboli Apostolici omnibus modis tenendum;

& à quo neutiquam licet recedere. Credimus enim in extremo die non alia diversa, sed eadem numero corpora, quæ in hac vita gessimus, à morte esse revocanda.

Desid. Sentirem non immerito pondus hujus difficultatis, nisi Arminiani traderent, non eadem illa corpora resurrectura, quæ nunc circumferimus, sed alia nobis danda, eaque substantiâ spiritualia & cælestia. Calovius. Disp. 37. Thes 6.

Tresont. Arminiani non sufficiunt ad tollendam hanc difficultatem, quorum auctoritas perexigua est, & à Protestantibus Angliæ vilipenditur; quamvis ante hac à multis suspiceretur.

Desid. Sed Anabaptistæ, quorum aliqua est cum Independentibus affinitas, statuunt in resurrectione corpora carne & ossibus caritura. Calovius. Ibid.

Tresont. Posset Anabaptistarum sententia apud Celsissimum Protectorem nostrum considerationem mereri; nisi semel solenniter statuisset Protestantibus non adversari. Videntur etiam nimis alienè fugi corpora humana sine carne & ossibus, quasi sola intestina cum nervis, venis & arterijs resurgerent.

Desid. Dabo, quod solidius est, & in hac causa peremptorium; Calixtus cum suis tradit, corpus mortale & immortale naturâ differre, & hominem per mortem supernaturaliter mutatum iri, etiam ratione substantiæ & essentiz. Calovius Ibid.

Tresont. Magnum illud est maximorum virorum testimonium.

Desid. Si corpus mortale & immortale naturâ differunt; non est unum idemque corpus: si homo in resurrectione supernaturaliter mutatur ratione sui substantiæ vel essentiz, non sunt eadem numero corpora, quæ resuscitabuntur. Et sic idem erit, si ve

Calixius vivens habuerit corpus ranæ, Psittaci, vel hominis, cum putaverit se aliud pro alio corpus recepturum.

Tresont. Dura est sequela; sed tamen legitima. Propter autoritatem Calixti eximiam non audeo gentem vestram à nostra fraternitate excludere, etiam si nequeat credere, sua corpora post mortem resuscitanda esse.

Desid. Placet & iste est ultimus Symboli Articulus, de cæteris enim jam vel convenimus, vel non necessarios esse ad fraternitatem remonstravimus in præmissis collationibus.

Conclusio Conferentiarum.

D*Esid.* Postquam in tot, tantisque rebus constituta est inter nos concordia; superest, ut auctoritate solenni fraternitas Psittaco-Evangelica-Protestantica-Anglica Angelica-Protectoralis confirmetur: Et siquidem Dominus Tresontius eam apud Celsissimum Cromvelliū perurserit; erit nomen eius magnum apud omnes Australes populos Regi meo subjectos.

Tresont. Mihi initio videbatur absurda propositio, de fraternitate Religionis cum Psittacis in eunda: sed quemadmodum equi inter se ignoti non ferunt sese ad eundem currum, donec assuetudine alter alterius halitui ferendo par fuerit: ita consuetudo nostra fecit, ut per multos articulos in idem conspiremus. Ego certè pro viribus meis allaborabo, ut Celsissimo Protectori nostro persuadeam, quod mihi est persuasissimum, Psittacorum Regi fraternitatem & communionem Religionis cum Protestantibus Anglis, Doministis & Calixtinis non esse denegandam.

Re.

*Relatio Doctissimi viri Magistri Trefantii ad
Celsissimum Dominum Protectorem.*

IVXta mandatum Celsitudinis suæ exhibeo in scriptis viginti & septem conferentias cum Excellentissimo Domino Desiderio de Oliva Regis Pittacorum Legato variis diebus habitas; ex quibus perspiciet Celsitudo sua, quanto fructu Doctores nostri longe maximam fidei nostræ partem ad Negotationes & Non-entia reduxerint: quanta utilitate Marcus Antonius de Dominis, Georgius Calixtus & alii viri præstantissimi à condemnatione dissentientium existimaverint abstinendum. Nisi enim ista subtilitas, & hæc moderatio intervenisset; præter damnum, quod per Pontificios Ecclesiis nostris imminebat, nunquam spes fuisset fraternitatem Religionis cum Rege Pittacorum ineundi, & doctrinam Evangelicam per vasta illa terrarum spatia dilatandi. Nunc autem à tanto Rege requisiti, fraternitatem Religionis videmur negare non posse, nisi multos nostrorum, & præcipue Doministas & Calixtinos à Societate nostra excludamus, magno omnium bonorum luctu, politicorum indignatione, infirmorum perplexitate. His exclusis, nihil amplius cogitandum erit de Dictatura, summoque Pontificatu, Patriarchatu œcumenico, & Episcopatu Celsitudini suæ, in omnes per Europam orbemque universum Protestantium Ecclesias, deferendo; ut qui non nisi mediante Doctorem istorum subtilitate, ac moderatione ad celsitudinem suam queat pervenire. Quapropter si chara sit ista dignitas, si utiles Ecclesiæ Calixtini & Doministæ, meo quidem iudicio, non possumus Regem Pittacorum à Societate Religionis nostræ excludere, quæ ad magnam Prote-

Protestantium gloriam per vastum illud regnum dilatabitur. quicquid adversus hanc sanctam unionem obloquantur nonnulli Lutherani & ignorantes Pontificii,

Resolutio Celsissimi Protectoris.

A Vdita relatione Doctissimi viri Magistri Trefontii super communicatione in puncto Religionis cum Excellentissimo Domino Desiderio de Oliva Regis Psittacorum Legato; visisque ac mature per nos ipsos ponderatis conferentiis inter illos habitis, nec non attenta approbatione spiritus nostri; declaramus, Regem Psittacorum cum populo sibi subiecto in societatem Religionis ab omnibus Protestantibus licite & sine ullo præiudicio sive ab hæresi, sive à superstitione & idololatria recipi & admitti posse. Mandantes nationibus Angliæ, Scotiæ & Hiberniæ auctoritate, quæ fungimur in temporalibus & spiritualibus supra omnes Reges prædecessores nostros, ut proximo biennio præfatum Regem & populum Psittacorum pro genuinis fratribus & locis Protestantium, Presbyterianorum & Independentium suscipiant & agnoscant. Requientes etiam fratres nostros Reformatos, Lutheranos, Doministas maximè & Calixtinos; nec non pauperes VValdenses per universam Europam, Asiam, Africam & Americam, ut nostro freti exemplo Regi Psittacorum, eiusque populo dexteram societatis non denegent; donec, biennio evoluta, & Monitis deputatorum interea allatis, res ipsa ad promotionem Evangelii nostri fuerit plenius examinata, discussa & conclusa. Ita volumus, non obstantibus quibuscunque conciliis Generalibus, Nationalibus, Provincialibus: non obstantibus Con-

cessionibus & Disciplinis : non obstantibus Cath-
chismis, Liturgiis, & libris symbolicis, non ob-
stantibus edictis Regum ac Principum, neque arre-
stis Parliamentorum & Statuum : nam quod Lu-
thero licuit & Calvino, nobis potiore iure licet,
siquidem plus quam Lutherus & Calvinus hic.

Datum, Londini 3. Octo-
bris. 1657.

OLIVERIVS CROMVELLIVS,
Protektor Anglia, Scotia & Hibernia.

Locus † Sigilli.

F I N I S.



CURIOUS OLD SKIT ON CROMWELL.

84 **CROMWELLIAN PURITANISM** (a Contemporary Satire).—LEGATIO REGIS PSITTACORUM È TERRA MAGELLANICA seu AUSTRALI pro SOCIETATE RELIGIONIS ad CROMWELLIUM ANGLIÆ, SCOTIÆ & HIBERNIÆ PROTECTORUM, imp. folio. *Septentrionali sun Theo., Juxta Copiani Prothocolli Londinensis* (56pp.); 12mo, wrapper, RARE, 21s

1658

A most curious little skit from (shall we say) the King of the South Pole to Cromwell, Protector by Divine Right of England and the lands under the North Pole, suggesting a fraternal conference to decide on articles of belief which might be equally acceptable at the South Pole.

It would be published in Cromwell's time, and is almost certainly unique: came from a fine old library, and bears on flyleaf the inscription "Eunt . . . Biblioth. Loescher Dresden VI. Kal. Feb. MDCCLI."